

唐
文
續
拾

唐文續拾卷四

榮祿大夫二品頂戴前分巡廣東高廉道加四級

臣陸心源輯

房渙

渙天寶中興州刺史

翠峰亭記

我皇帝道高前聖德邁三皇天下晏然四方無事朝廷清謐常思蹈舞之儀宮苑歡娛每賜春遊之賞天恩廣備錫賚見霑旬日飛觴求諸勝地武興泉石觸目驚人况卜良遊自口奇絕順政遊勝郡南十里山障重複石壁千雲淥水澄灣清冷見底崗巒掩映蔥

翠難名雖王羲之蘭亭未足云比石季倫金谷豈可
同年渙叨忝專城常霑宴賞同諸英佐□盡歡遊天
寶八載三月二十日□□房渙自書

按全唐文闕名所收房使君題記實翠峰亭銘卽
繼此記而作撰銘爲太原王下當是繼房渙守郡
者

宋叔鈞

叔鈞大厯中河南府進士

窄澗谷肅上人禪房記

於西域耆闍東溟方丈蓋羽化之所窟宅眞如之所

游衍攸哉邈矣固難得而周流其於一邱一壑勝之
美者亦往往有焉□王屋大口左右相睨方且七百
其高萬仞松桂蔽植峯巒交薄幽奇之麗者何可單
論而此谷焉特名窄澗黃緣六七里攀援數十丈一
壁卻立直戴雲天兩崖翼張橫窺日月稽首則神靈
交集笑語則雷風聿興伊昔鄉人選勝茲所宏願旣
果經始勿亟其始也琢石爲堂功成一簣其終也飾
金作像數滿大千而物換時移斯迹猶著翔而後集
不亦宜乎我上人德冠三乘行超十地夢幻嚙體□
月澄心以禪寂爲不二之門以意識爲五蘊之戶克

紹先烈獨秀□林乃拔溺寰中投身物外懿其事也
構其居也因厥舊而新是圖採□不斷亘爲禪宇爰
居爰處南東其戶西次冊步別置水亭焉高纔一尋
方僅五尺磨泉自出環流鏡清注于平湓爲沼靈草
千種修篁數莖花香互開煙媚時發春禽輟哢似聽
色空元猿罷吟如求漸頓登陟者結縛懸解經行者
塵昏自朗僕野人也夙尙雲林性本疎散逮此眞境
翛然忘歸况羞我以桎梏誘我以泡幼知□隗之不
遠識害馬之累生筌蹄頓忘世事如掃參則不敏請
濡翰以記時聖唐大曆七年歲次元黹姑洗月也刻

崔珙

珙官正議大夫行定州別駕兼太子僕賜紫金魚袋
上柱國

大唐故曹州成武縣丞博陵崔氏府君改葬墓
誌銘并序

珙昔遊於鎬京雍洛梁宋河朔名山大川秀潤形勝
之地復出入往來二陵之間觀古之宰貴重臣祠廟
上塚之所見其崩摧便房遺櫬與朽壤偕盡而獨銘
誌存焉故諸侯計功大夫稱伐勒名金石所以傳無
窮之歲況我先君府君德邁前古衣冠茂族萬代一

家扶風太君太夫人河南褚氏坤順志柔和顏清敏
榮因重貴明德惟馨安可闕而不書矣先父府君諱
文脩字文脩宣德郎行曹州成武縣丞博陵安平人
也先炎帝神農太公之後脩食邑於崔因封賜姓自
大唐受命之初封陳留縣侯因封而家焉子孫相傳
已七代自漢高帝九年歲次癸卯爰及大唐八葉百
有五十四年卅一世綿歷八百八十四年白周秦漢
魏晉宋齊梁隨唐世世爲卿相大夫至今軒冕尤盛
代爲名臣高祖客王皇朝夔府都督大王父諱民英
皇龔封太中大夫守汴州刺史陳留縣侯王父元周

皇宿衛出身拜滄州景□縣主簿蜀州晉原縣尉勅授朝散大夫蔡州吳房縣令皆宣風惠□仁德濟以至于先父府君軌範自天上善若水內外三教窮□之要道知諸行諸終始不替承先人餘蔭宿衛出身拜潤州叅軍□任曹州成武縣丞仁義包含器凌江海才高賈誼位屈桓譚不幸積善無徵奄鍾天罰開元廿八年九月廿九日遇疾不瘳崩背官舍權安厝於汝南郡吳房縣城西北百步嗣子勉等昊天罔極思古敦本而思本焉以大厯六年歲次辛亥八月甲寅朔廿九日壬午龜筮勒從遷厝於博陵郡安喜

縣城南一里長原禮也玼才行無聞不敢光揚休烈
但直書其事用表其千秋不易於琬琰其詞曰

長原博陵地橫千古樹茲松櫬再封吾土哀號先人
掩於泉戶仰天泣血伏茹荼苦永惟世業爰諸禰祖
忝繼箕裘悲慙尸主宅兆有期塗車已成像設九原
分裂五情日慘寒色風淒晚聲叩地長懷心摧骨驚
刺肝書血刊石勒銘

石刻

韓雲卿

全唐文四百四十一有傳

鮮于氏里門碑

并序

鮮于殷姓武王剋殷獲洪範於箕子封于朝鮮其子

仲食菜於缺京兆尹魏有輔爲度遼將軍家於燕國

因爲漁陽人也降及□皇缺刺史因家閩中閩州生

簡州長史士簡簡州生贈衛尉卿令徵□賜缺尉生

二男長曰仲通以秀中上第驟履臺閣爲益州長史

兼御史缺五十四州節度採訪等使威化廿於嶓岷

入爲京兆尹幼曰叔明缺金商等州採訪使入爲京

兆尹自左庶子出爲遂州都督兼御史中缺一十四

州節度觀察等使封漁洋郡公仁惠洽於巴渝子姓

甥姪缺典方嶽更處臺省衣冠欽其禮鄉里服其義

雖及羈貫皆象服是飾缺化而成風夫德及於人者

慶延惠施於物者賞博若鮮于氏之德是宜缺章播

流金石永善後裔辭曰

姣姣箕子爲殷仁人遠耨立周迨爲周賓獲氏因地

子孫世嗣幾二千載□□有國因官閭中三代勃興

降生二公欽惟二公懷器佐時尤行懿姿龍變□□

維□方伯□國落□□時楷式繩繩子孫佩禮服義

職典中外灼耀名位□□溫故儒衣□襜服禮勞謙

巴渝岷蜀□風成俗在昔炎漢里有萬石下及季□

清風欠□千祀再激興替之原禍福無門義虧族夷

德修慶繁銘之里門

石刻

侯總

總大歷中團練判官將仕郎試秘書省正字

刺史兼殿中侍御史薛公敬造石阿彌像讚

并序

大聖不可得而名後之者□思儀形或範金或剡木

或黼黻藻繪寓厥法身是崇瞻仰夫金則鑠玉則蠹

黼黻藻繪倏然成空徒竊因緣之名深乖久竟之義

粵居貞以全璞不□不琢據連□以示現與厚地而

終始則此龕石阿彌像像在焉誰其尸之繫我邦伯

公□澄降趾河汾丕承令緒德禮相顧清明自持建

旃施父母之恩執簡勵風霜之操遠夷景附黠吏波
逝葺荒堵成安居變萊田爲嘉穀寔相門之良胤王
國之令臣復能通向眞宗勤求上善割清白之俸資
莊嚴之費爰稽厥初之考制也梵侶相宜口師獻藝
梯絕壁鏟蒼苔載琢載礪無晝無夜大斫搗以雷落
小忽霏而星飛坎坎之聲雖非擊鼓冲冲之狀頗類
鑿冰曾未逾時口相斯起精微擬於神道敬信協於
人謀德水寶池似生淨觀白鶴孔雀將出雅音誰悟
幽棲道場粗同極樂世畍惟二菩薩左右儼如靈趾
融融暉暎廣座先是落澗有口石燃燈有廢木石則

如礎者如鎮者木則任榱者任棟者公命攜僕以負
之購良工以營之石以裨高階木以架危閣一則雲
矗一則砥平永忘燥濕之慮妙契修行之願所謂易
有之無裒多益寡微公之達識宏量其孰能臻之猗
歟□人□流靜□也圖事以□堅智也微福不私已
仁也夫如是宜其法尊天祐百祿是適爲龍爲光令
問長世總職忝司戎亦嘗讀舊史氏祖命授簡多媿
缺七

眞聖

缺

人□深

缺

粲爾鏡徹掩然霞張射林

缺十字
二字延

長位斯崇德厚羗福田之充溢固將等□□□□

大曆十三年二月廿一日刻石

王璿

璿建中二年易定等州觀察判官掌書記朝散大夫

行司士參軍

本主客員外郎官石

碑題名

監察御史

精舍題名

按廣異記有宋州刺史王璿又云乾元中王籍者太常璿之族子太平廣記大理卿王璿改金吾將軍疑卽一人與全唐文二百五十九王璿別

唐符陽郡王張孝忠再葺池亭記

上谷古之郡名昔韓魏列土郡卽燕國南都之地也

昭口霸有幽薊雄據朔易殆秦并天下朝市淪替漢

魏已降空餘丘

下缺

侯或封地爲城樹

□□□因舊臺

榭濬爲池沼□□□社邑都也今茲山亭□爲陳跡

稽之□代考諸興建則圖藉不書下缺風雨所蠹傾頽

靡葺我故相國司空贈太傅李公自守除姦臣秉節

恆岳地方千里帶甲數萬擇良將以摠戎任良牧以

守郡得□□□我□下缺陽郡王張公曰孝忠剖符于

茲逮今三祀戊午歲天作霖雨害於案盛人多道殲

邑無遺堵王之來也其一之缺郭理疆場□通亡卹

鰥寡躬問疾苦坐不安席志通鄰好憂人阻飢使屢

空之家無不自給負米之孝知其□歸況徵缺輸軸

重探之法人吏一變姦欺絕源老幼相攜歸府知□

此乃事不師古抑謂王命維新寇盜既除囹圄亦殄

其缺以□壘□隘首集□技雜□□□軍人都□寄

於閭閻縑黃酷於腥羶里巷厄於爭鬪王於是相地

建營訓以缺庫猶□猶其軍實或時朽蠹足以□粒

聚於□門塵滓穢其毫相王大菁倉庾納□□坛啟

缺景福比及三年兵自戢民自安眾自和財自阜然

後散利薄征緩刑寬□況聽政之位有□王能補外

館之地不缺王能□厚其牆垣壯其□宗□□足以

納幣高視可以臨人甘常肅恕以庭無事或時涉層

臺以觀雲物下西亭以玩魚缺池審曲面勢乃匠新

意革舊□必將掉扁舟垂釣□鳬鷗獨遊□吏則止
水可爲江湖一鳥可齊天地向若犒師享士缺使文
武畢會尊卑有序則斯□也□□得接□□不得旋
踵我王智深天機神與心計而能力役焉獲斧斤缺
利之泉拔有窖□來外蓋其□□挾其流一駐鬼神
若車造化則蚩中江漢在□淺深皆上蓬萊因多盈
縮然後□壝缺狀□洞之新開飾簷楹之舊制雖□
持之狀至麗而平易之功至□其廣也可以廻車輿
其博也足以列冠蓋幽足以棲隱缺神可以私事梢
梢松響耽耽柳陰長疑九秋不知三伏夏五月王以

居缺久之缺五居人缺十軍□□迴淨域地變禪宮

固請律儀謂缺九實缺五魚□泉缺五殮缺六識下

實下所以洩汗□也□不有命爾缺七之□水所缺

如此□□大□□志必盡家□下□□百下戰會□

□璿曰茲郡□下見其□□濬扞獨有此地郡之遺

門下命於座末其軍川□□□察□□碑陰□歲在

作□□會□□□戊辰功畢下刻石

李挺

挺建中時揚州高郵尉

陀羅尼幢記

孤子李挺挹揣扑拱等號天稽首十方一切諸佛諸
大菩薩虛空一切賢聖弟子歿各深重不能自殞摧
心泣血弱息餘生先考常誦持陀羅尼呪及金剛般
若波羅密經挺等哀苦靡訴精誠向佛敬造此幢并
諸功德伏願先考疇日所曾誦持經典永習無忘宿
世已來或有業障應念消除觀文見影皆蒙資福惟
願諸佛菩薩虛空一切賢聖慈悲證明加被先考乘
諸功德坐西方淨土見佛聞法心得自在成無上菩
提建中二年八月十九日建

石刻

楊咬

咬興元中廬州長史

大唐東都弘聖寺故臨壇大德眞堅幢銘

并序

大德法號眞堅河南府王屋人也俗姓楊卽弘農太尉之苗裔宿植善根天生異俗自小不茹葷血十三卽志願出家孤標不羣氣識殊眾累經阻難確乎堅貞年廿具戒後卽探討毗尼製道儀鈔傳於後學莫不遵崇宗旨遠近流行乃至新羅異域尤加尊重初准勅住天宮寺後奉勅抽充弘聖寺大德又充會善寺臨壇十大德其爲性也恤貧敬老救病哀弱嘯傲名利脫略誼繁興元元年五月十二忽示現生滅終

于弘聖寺本院俗年五十有七僧臘卅七夏其月十
五日於東都龍門西天竺寺南堽面陽安厝儀也出
家姊安國寺主真心俗弟廬州長史皎弟子弘聖寺
僧嗣興等敬造尊勝陀羅尼石幢以記遷謝其銘曰
天生聰惠兮辯正邪割愛辭親兮小出家脩持戒律
兮淨無瑕傳述聖教兮逾海涯色身默世兮歸寂滅
聲聞空存兮滿京華手足永斷兮不可續送終追往
兮徒悲嗟

石刻

李衡

衡系出大鄭王房官清漳尉

新表

建中四年咸陽令

奉天

錄

度支員外

石柱題名

郎中

本碑

常州潭州刺史湖南江西

觀察使

舊紀

以給事中爲戶部侍郎諸道鹽鐵轉運使

新書劉晏傳

唐絳州聞喜縣令楊君故夫人裴氏墓誌銘

并序

維唐貞元元年仲冬十一月十有七日聞喜縣令楊君故夫人河東裴氏葬于京兆之九岷原禮也裴氏其先自周漢命氏爰及晉魏衣冠煒盛入裴之稱爲冠族歟至于隋唐蘊而不竭與韋柳薛關中之四姓焉曾祖友直皇朝給事中簡要清通鬱有時望給事生子九人並以文學懿德盛于當時祖伯義皇朝彭

州刺史卽給事府君之第四子也履歷顯官至于二千石元純茂于闡闢教化布于州人烈考諱就皇朝大理評事重以德義聞於盛朝何才高而位卑復積慶而無嗣神亦輔德故鍾美於二女焉夫人卽評事府君次女也性根大孝禮自生知幼辭嚴母之訓長習仁姊之教是有令問光昭六姻及笄而嫁楊君君弘農人也四代五公寔當榮耀雅有才器登于子男夫人輔佐周旋韻諧琴瑟楊君叶和敦敬禮達閨闈豈期風落天桃露萎芳蕙神理不昧泉臺已深嗚呼哀哉夫人伯姊嫁於吳氏吳君大厯之中爲國元舅

志匡帝室承國寵榮伯姊居貴柔謙敦睦親族痛鮮
兄弟哀于禋祀乃與季妹形影相隨永言霜露之思
乃發篋篋之有夫人述伯姊之志赴東周之宅由是
裴氏之三代祖考而松檟修焉建中歲大盜移國夫
人東北喪朋從人故絳天遙地隔支折形分乃不茹
輦血積變成疾以至於瞑目哀哉吳氏伯姊遠自巴
蜀含酸護喪遠日有期陵谷攸記志于泉戶見託斯
文銘曰

和氣氤氲與物青春芳爲天桃茂爲淑嬪展矣淑嬪
禮誠德富尊松之貞踰玉之素爰及笄字適彼良門

婦道光儀百氏稱□不有令姊孰茲歸妹義隔存亡
名傳中外婉彼芳質朝露何先泉厠一閼萬古千年
刻石

王泉

泉貞元中官滎陽縣令

按與全唐文二百五
之王泉別爲一人

移碑記

夫爲政有愛於人人則思愛而紀其政或尸而饗之
或碑而頌之使芳名轉彰舊績不泯豈獨光於前哲
亦冀後賢警慕而似之公爲政有聞是以皇帝降書
以稱其名勒書爲碑舍人劉公作缺四其績刻於碑

陰其碑巍然立於水東道北雨頻壞道其過者不得

周覽但知其名莫得

字缺七

年四月天作雷雨震碑仆

於坑口碑攢少虧龜破四段吏人告余余駭而

字缺九

洗而視之其文壞蔚其蹟殊特顧問從吏從吏不知

及問邑客無有知者噫余以爲口天

字缺六

盧君之德

行彰劉公之文學不然者豈盧君有隱隱耶余乃上

白府君韋公請自輸俸

字缺五

於縣門以光其邑韋公

允之乃遂事也于是碑縣

字缺二

文績再揚余雖不敏

警慕高跼刻于

字缺三

記移日貞元十八年二月十日

滎陽縣令王泉記

按與全唐文九百八十七盧府君碑陰記微有不
同

許琳

琳官節度判官掌書記朝議郎殿中侍御史內供奉

三世像讚

并序

宅眞體如質平因像之義如梯斯瞰緊筌與諦明矣
有唐成德軍故節度押衙贈禮部尚書張公曰孝義
今相國檢校司空符陽郡王曰孝忠之介弟也鷹揚
鸚胎依仁履梯適來色界采入玄門遂躡徧名山覽
得勝剎迥出鳥路宛臨諸天巉峭寒圓寔靈聖之所

棲宴也公徘徊久之欲休於斯王途東夷匪遑乎而
爰蒞佛事儻素工去來見在一堂四列而丹繪未就
罹惟岳之亂以身殉國哀哉洎元方秉鉞登覽泣然
減俸紹成顓弘幽獨讚曰

道實因人人實因像金光紺色心存目想識自內融
形斯外獎肇迹伊季續功惟長猗歟卬歟卬猗猗歟
克夥平權輿

石刻

盧徵

全唐文四百七十八有傳

右司郎中造觀世音菩薩石像銘

并序

缺
皆爲 缺
如夢 缺
知□一如□也 缺
香 缺
降因發誠

願歸旋之日於□造等身像一軀此乃夜郎之役也
貞永之□又易於此僕夫在後獨行山側白衣路人
隨馬先後因唱言曰去日花開來時菓熟其去也春
三月貶□州長史其歸也秋八月遷右司郎中詳求
所言有關昭報復以闔門幼弱萬里汭沂畏途炎裔
鮮克保令勝衣含氣我獨無□卽知慈雄覆護匪無
顯効心形衒惕焉敢慙忘復以小子童巾已來常元
持大悲菩薩如意輪陀羅尼卽我本師願敦永劫今
所鐫刻常爲依怙其莊嚴相好花鬘瓔珞悉憑經教

豈無感通長兄從時任河南府司錄參軍 缺 聖善寺

沙門處常圖終創始選功捨財罔不精竭歲事已畢

缺 一燈明傳三界歡喜感躍以偈爲銘銘曰

缺 告仰訴大悲有如昭報嗟乎大悲隨方救護哀我

數年 缺 悉如燎原炎炎蒸瘴行看跼鷲惟此身勢豈

期生令惟 缺 不口旋再昇九天如出九泉眾靈在空

如日高懸無日不見無 缺 如君如父思報何緣遂刻

全身于此山巔山旣不朽像亦常存明發 缺 懷曷論

庶爲依怙子子孫孫豈無深信其仰丕尊 刻石

楊叶

叶貞元中鞏縣尉

唐故禪大德演公塔銘

并序

如來滅後五濁惡世厥有悟最上乘者卽我大師歟
大師俗姓柳法號明演累代家於相州湯陰縣幼而
溫敏長而良逸蘊顏子之德昇孔子之堂天寶季擢
明經第寶應中調補濮州臨濮尉後遷濮陽丞清能
肅下威能懼豪芳名振於齊魯之間孰出其右因詣
方袍士語及無生喟然歎曰萬法歸空一身偕幻瑣
瑣名位曷足控搏遂投紱捐璽適于京師時神策都
知兵馬使檢校御史大夫王駕鶴奏曰前件人捨官

入道樂在法門寺因章敬皇后忌辰伏請度爲僧詔
曰可乃隸名於洛陽縣敬愛寺因具戒於嵩岳壇塲
厥後口茹一麻身衣百納洞達五方便探蹟修多羅
雖思代居梁仞圖在趙方茲蔑如也興元初延長定
覺念定舍邨七八年間歷扞開法龍象鱗萃冠蓋雲
集濟濟焉鏘鏘焉得其門者或寡矣歛思振錫步及
於鞏縣淨土寺縣尹隴西李公閑泉夫人吳郡張氏
禮足歸依虔心諦聽淨財珍服捨而勿愆由是景附
響和者不可勝筭非夫慧日懸空寶炬破闇其孰能
臻於此乎且迥出四流旣遠離於煩惱遽成三黜徒

示現於涅槃盤以貞元十七年二月五日整三衣掩一室汨然坐化容白如生四眾漣洳奔走織路俗齡六十有九僧臘三十有三門弟子淨土寺主智德律坐主常隱神昭寺三綱寶燈堅志如印等因心起孝扶力議事言於同學曰不建塔曷以旌盛德不刊名曷以紀高行謀之既臧岡不率從未遷期縞素疊委泉穀交積傭工度地埏埴爲甗不傷財不害人格于十旬傑其高時以明年春繩牀趺坐歸于厥中左邇名區前臨清洛浮雲郎月松檟颼颼叶從官於茲嘗陪高論援毫含歆遂作銘曰

於休上人偉白昂藏遺榮濮上練行嵩陽淤泥自濁
荷花自芳澄思一室聞名四方了悟真詮門人駢闐
雙林遽變孤磬空懸屹立素塔遐對清川憧憧行路
孰不悽然

石刻

李充

充貞元中官太中大夫守京兆尹上護軍賜紫金魚
袋

大唐東都敬愛寺故開法臨檀大德法玩禪師

塔銘

并序

禪師諱法玩俗姓張氏其先魏人也年十八學道於

大照大師廿受具戒報年七十六僧夏五十七以貞
元六年秋八月十三日寂滅于東都敬愛寺越十九
日門弟子等奉全身建塔于嵩丘少林寺之西偏纒
杖執紼赴匱會葬者以萬數弟子安國寺尼法名寂
然師以志性堅操菩提心猛利故號爲精進軍卽予
之從母也躬護厥事其明年冬十月新塔旣立將以
抒門人永慕之志播先師玄邈之風俾予叙銘以示
來裔曰嘗聞拯羣迷者根乎道弘至道者存乎人至
若播甘露於法林架慈舟於苦海反邪歸正化昏作
明教被灑洛德高嵩少實我禪師其人也夫紀無相

之□□□其族譜述無爲之教宜捨其示現故不書
姓系不□□行直言秘旨用闡眞宗而已自像教東
流法門弘闢□戒律攝妄行以禪寂滅諸相以辯惠
通無礙禪師總斯三學濟彼羣生或居嵩高或住洛
邑道俗師仰遐邇攸歸應用無方稱物施化惠日恒
照無暗不除寶鏡常懸有昏斯朗嘗謂門人曰正法
無著眞性不起苟能覩眾色聽眾聲辯眾香味眾味
受眾觸演眾法而心恆湛然道斯得矣大凡禪師設
教導人必形於行以爲法無憎愛故喜愠不見於色
以爲法無分別故貴賤視之若一以爲法無取捨故

齊於得旨以爲法無去來故泯於生滅是以訪道者
聽言昏解觀行學成非夫心契真如識通妙有孰能
修身演化如此其盛者歟清川東注白日西匿歸真
於此空山杳然銘曰

嵩山之陽兮靈塔尊色身旣滅兮妙法存誌此貞石
兮弘教門石刻

陸淳

全唐文六百十八有傳拾遺卷二十六

印記

最澄闍梨形雖異域性實同源特稟生知觸類懸解

遠求天台妙旨又遇龍象遠公摠萬行於一心了殊途於三觀親叅秘密理絕名言猶慮他方學徒不能信受所請當州印記安可不任爲憑

大唐貞元廿一年二月廿日朝議大夫持節台州諸軍事守台州刺史上柱國陸淳給

日本鄰交徵書

鄭審則

審則貞元中明州刺史南祖房地官員外郎元敬曾孫

印記

孔夫子云吾聞西方有聖人焉其教以清淨無爲爲

本不染不著爲妙其化人也具足功德乃爲圓明最
澄闊梨性稟生知之才來自禮義之國萬里求法視
險若夷不憚艱勞神力保護南登天台之嶺西泛鏡
河之水窮智者之法門探灌頂之神秘可謂法門龍
象青蓮出池將此大乘往傳本國求茲印信執以爲
憑昨者陸台州已與題記故具所覩爰申直筆

大唐貞元廿一年五月十五日朝議郎使持節明州
諸軍事守明州刺史上柱國滎陽鄭審則書

同上

唐文續拾卷四

唐文續拾卷五

榮祿大夫二品頂戴前分巡廣東高廉道加四級

臣

陸心源輯

吳顓

顓貞元中台州司馬

送最澄上人還日本國詩序

過去諸佛爲求法故或碎身如塵或捐軀疆虎嘗聞其說今觀其人日本沙門最澄宿植善根早知幻影處世界而不著等虛空而不凝於有爲而證無爲在煩惱而得解脫聞中國故大師智顓傳如來心印於天台山遂賫黃金涉巨海不憚滔天之駭浪不怖映

月三
日之驚黿外其身而身存思其法而法得大哉其求
法也以貞元二十年九月二十六日臻於海郡謁太
守陸公獻金十五兩築紫斐紙二百張築紫筆二管
築紫墨四挺刀子一加班組二火鐵二加火石八蘭
木九水精珠一貫陸公精孔門之奧旨蘊經國之宏
才清比冰囊明逾霜月以紙等九物達於庶使返金
於師師譯言請貨金貿紙用以書天台止觀陸公從
之乃命大師門人之裔哲曰道邃集工寫之逾月而
畢遂公亦開宗指審焉最澄忻然瞻仰作禮而去三
月初吉遐方景濃酌新茗以饒行對春風以送遠上

人還國謁奏知我唐聖君之御宇也貞元二十年已

日台州司馬吳顗敘

日本鄰
交徵書

郭洪

洪貞元中宣德郎前節度駟使官試左衛兵曹參軍

唐故行涿州司馬金紫光祿大夫彭城郡劉公

墓誌銘

并序

仁德忠貞君臣之節義理家孝悌亦爲政之榮基方
府君能盡忠於國純孝於家可謂忠孝雙全者矣府
君諱逮字逮漢室本宗彭城是望昔自塵飛中夏達
士蓬征逐勝而遷燕臺應納于茲數代不復彭城今

卽燕人也自大父以前多遇荒□不明難爲具載昭
穆故順化州刺史兼侍御史諱瓌卽其先人府君伯
季六人房居第二先兄諱逸青春之年已卮人世痛
哉絕嗣府君天授仁孝襲紀□綱居卽共被同飡分
飛乃哀鴻霄漢大厯中詩書成立節行□天特賜金
紫光祿大夫行涿州司馬仁佑勳賢振乎千里次第
九愛弟諱迅藝□文筆儉素守官行幽府司戶參軍
再厯檀州司馬謝於瀛州景城縣之令長其次第十
諱□才兼文武勳業重重厯職轅門駐鷄五邑淹於
潞湄縣之□宰次諱□□□迴車之宰大邑終於涿

郡歸義縣季曰諱邁守檀州司法參軍三十未餘已
傾下壽或日鷓鴣羣飛聖代急難返及子孫餘慶未
□府君歷任年代碎務開心祓氣俄臨疾忽於甚貞
元十四年十二月八日謝於□□之公館時春秋四
十有五有子兩人長曰拭次曰摸聰敏孝行人所難
偕摸則殂於不幸拭乃孝嗣奉先有女一人適吳郡
朱氏婦德世知朱君早逝府君靈櫬比者龜筮未□
權在大塋今乃兆遷潞城西南□里之原禮也哀號
送往孝思未^缺讓儀毀容誠可繼於曾^缺當宅相幼
沐殊恩無路効於始終□銘記於貞石詞曰

府君物望兮間氣自天雙持文武兮聖代勲賢鷹行
忽斷兮各□天際空存嗣子兮孝行相傳新闕巍巍
兮看成拱木銘記昭昭兮將憑萬年石刻

李師直

師直第進士元和中人

唐嵩嶽會善寺勅戒壇臨壇大律德塔銘

并序

詳夫金人應世迦維誕生玉毫騰耀於八方教法流
傳於此土三乘並駕五部齊駐澄混不雜者惟律宗
焉中有紹繼挺生者卽吾師矣諱惠海俗姓張漢司
徒之胤今爲河東猗頓人也七歲尋師于妙道寺精

持寶偈卽維摩法華一部自年逾弱冠具戒此山當
寺遂拔游二洛精研律宗前後敷揚約廿餘遍自貞
元七載奉勅臨壇傳教度人莫紀其數至貞元之末
情慕大乘伏膺於魏府門下精通楞伽思益搜蹟玄
微名貫三秦而數郡邀請匪度物之將倦而志居雲
壑者矣伏維和尚德重巨嶽釋門孤秀包綜三藏精
通一乘凜凜兮如方丈寒松皎皎兮似一潭秋月
若乃香壇康法得度者而數越稻麻親授衣珠者人
踰數百理應高懸仏曰重耀昏衢豈期宏願未終化
緣將畢享年六十有五僧臘卅有九於元和八年癸

已之歲十二月廿六日示疾端坐念茲无生乃告門
人言歸寂滅門人惟峰遍澄等隳裂肝膽聲悲涕流
恨長夜之忙忙望靈儀而恍惚遂乃召以良匠罄以
衣資卜于名山崇茲塔厝其塔也聳湧雲際稜層碧
空左挾天中之古祠右俯玉華之壯氣前臨潁水之
瀑布卻倚羣峰之屹聲彫白玉以爲門疊龍鱗而成
質卽知匪其銘也無以彰五師之德匪其塔也何以
表師資之孝誠余雖不才聊爲銘曰

玉豪隱耀兮西土三乘並駕兮東馳律宗委囑兮波
離後有吾師兮繼之白雲起兮青山暗戒月沉兮世

界昏不知迷子何時悟萬古空餘鴈塔存

石刻

李仍叔

仍叔字周美初名章甫系出蜀王房元和五年登第
歷官右補闕水部郎中宗正卿湖南觀察使太子賓
客

唐渤海王五代孫陳許潁蔡觀察判官監察御
史襄行李仍叔四歲女德孫墓誌銘

并序

女生元和乙未歲七月廿日亡戊戌歲七月十八日
於同州內城官舍來廿七日己酉瘞京兆府萬年縣
龍首鄉因聖寺佛閣西門之南地土連亡叔之墓風

接西塋之松冀爾孩魂不怕幽壤銘云

姓李氏生崔氏聰明神光骨髮天祉言語未正自解
親親願瞻溢彩顏色沉人走弄之間嘔吐生疾氣噎
深喉血流中質玄風潛吹元精不凝柔閑在抱呼哭
莫應既未及殤詎可等彭肝膽煥起無奈此情刻石

王禮賢

禮賢元和中試左金吾衛兵曹叅軍

太原王府君墓誌銘

井序

唐元和丁酉歲夏四月廿九日太原王君終于平原
郡財城里之私第春秋五十八嗚呼哀哉曾祖諱協

祖諱志良烈考少恆咸獨韞當代俱有其才君幼稟
紳和長懷劉正藝應時出擅女媧之笙簧洞諧子晉
之音遠叶伶倫之妙鳳響龍韻宛如神仙故得奇伎
致身出入王族厯事顯貴垂三十年恭謹謙貞終始
若一雖陷于多智梅臯毓詞善戲謔兮無以過也方
將壽比靈柏何大寒而凋粵以其年十月五日卜窆
于都城西北五里原禮也夫人殷氏先府君而逝有
子二人長曰元佐次曰元祐女二人俱懷孝思逮至
臧性將啟舊窆附于新封哀哉銘曰

蔓草蒼茫原邇迤王君令室窆于此雙劍一歸幾千

月三
祀蕭瑟悲風終夕起石刻

顧方肅

方肅元和中吳郡人

唐故趙氏夫人墓誌銘

并序

夫人姓趙望在平原祖歿年遠子孫絕嗣無人紀于
後世之事今難序焉夫人父諱萱皇朝定難功臣官
憲試鴻臚大卿先夫人三十年已前而卒夫人卽先
鴻臚卿之令女也笄年十五執事箕帚而適于楊氏
之門如鳳之飛雙鳴相應周旋二十餘載而楊君寢
疾去元和六年十一月終于京兆府長安縣閭闔之

肆殯金光門外小嚴村之里墳塹存焉兒女九人皆
尙幼稚孤斃撫育霜露所哀追攀永懷哭對寒燼夫
人尋患腰腳行李不逮雖坐禦家事猶慈和六親春
秋屢徂容鬢衰改且貧無以爲節禮徇時宜鰥寡多
猜迫以從事方再行于吳郡顧氏低迷四五年而公
潔躬文字未達寓居中彭漢武初興之地矣夫人元
和十四年七月十一日不起宿疾終於茲川以元和
十五年少帝卽位二月五日改號爲永新元年以其
年歲在戊戌二月十二日歸窆于長安縣昆明鄉魏
村先妣段夫人之塋禮也嗣子四人文晟文幹文暘

文昱等皆以哀號泣血匍匐仰天聯翩弟兄永失慈
訓方肅以哀情所屬慮在幽冥刊石爲文記之於壙
其銘曰

惜哉仁賢逝往中原拚瘞蓁棘親賓共憐愚夫撰銘
買石彫鐫建記陵谷他時獲全林栖暮鷗隴慙啼鵲
寂幕春墅長宵月懸浮生幻化五蘊虛假萬古悠然

千秋永夜

石刻

朱千乘

千乘元和中試衛尉寺丞

送日本國三藏空海上人朝宗我唐兼貢方物

而歸海東詩序

滄海無垠極不可究海外緇侶朝宗我唐卽日本三
藏空海上人也能梵書工八體繕俱舍精三乘去秋
而來今春而往反掌雲水扶桑夢中他方異人故國
羅漢蓋乎凡聖不可以測識亦不可以智知勾錢相
遇對江問程那堪此情離思遠增願珍重願珍重元
和元年春姑洗之月聊序當時少留詩云

鄰交
徵書

郭審容

審容字惟肖長慶中文林郎權知龔邱縣令攝中都
縣令

更廟紀

穆宗改元之星鳥月走承府僉攝宰于冀邱旣至未
遑恤于鰥寡而首謁乎先聖見祠宇崩圯土復身所
一邑之豕牛□□焉乎□其頑童駭孺恣以彈射田
夫里婦互進紙錢滴觴羅拜祝祉目之爲夫子神□
烏虜當天地之冥昧非大高□而罔照泉禮樂之崩
缺非先聖卓立而莫振魯先聖之出也盍先百郡而
謹之胡迺先百郡而□墮之日用弗知以之行簡縱
氓俗之滯祀□簡之□義豈若是耶走退詳其事罹
方割之害闔戶爲魚者累累入耳焉徵葺之猷身

惟艱矢乃□諭里客之名于籍者與夫里生之數于
學□殊音共詞不從厥志胥僉損服膳而卒修之肇
其載之季秋訖來歲之仲春繪素聖□□□十二子
列二十二儒環身產壁□之讚述如其國庠矣迨癸
卯歲之三日走荐承□□粵以竝缺五三載而積□
□移理之辭岡克允而來乎自龔至之日復首謁于
先聖祠宇崩圯猶復龔矣吁其甚者厥趾處一方之
震位□□□之隘陋傍瞰翳蒼俯矚穢蕪里墉蔽其
前每周旋而通衢焉由此言之殆不若也矧先聖制
爲之地男女車徒之軌存乎目壤垣弗建傾棟弗扶

隳口弗繕曷以觀古人之象喟然復歎乃申元戎而
更之度其身中撤屋而堂端口屏口口于康在采
章序列亦猶夫口龔矣於是又經北室爲師儒函丈
之所翔兩序爲學者親師口口俾四方之潔已進修
者咸處之而以藏息焉備歲貢于有司庶幾將來口
口冈奪其缺七字冀天下篤教敏行口口先于魯也
至若先聖口口德合乎玄黃昭隣乎日月數如六籍
非鯁敢稱今所紀者更而已矣石刻

元晦

全唐文七百二十一有傳

于越山記

直渚之北有虛楹釣榭由此三徑各趨所抵左指山隈右向之僧舍爲寫真堂北鑿山徑由東崖茅齋經樓真洞而北史記云秦并諸侯以百越之地爲桂林郡吳遣步騭征南刻有于越

廣西通志

舒元興

全唐文七百二十七有傳

承天軍題名記

有唐長慶元年秋七月趙人亂其帥宏正爲下所弑我公奉詔率諸侯之師問罪冬十月師次於承天軍

十有二月入貴眾下天子下哀痛之詔下庭湊爲帥

以息人也是月班師晉陽公命掌書記元興錄其名

爵泊參佐將校凡五十九人刻於承天軍城西石壁

公有舅有弟自他府來有二子從行咸附列於後廿

一日癸未舒元興題幾輔通志引金石錄補

王化清

化清寶歷元年文林郎守端州司馬

遊石室新記

高要郡北十五里有石室詭怪萬狀崆峒其中發揮
靈蹤盤薄厚地皆神仙之窟宅爲區奧之勝槩或有

巨石皆似蹲獸反顧疊化仰空的皦瓊脂色如截肪
矣旁引危竅疑爲洞門橫聳石床方次仙座西廂峭
壁之下有涵泉泓澄鏡色味輕瑤漿東西倚山之陽
二十餘里西通于上武林東抵于零羊峽時開元十
五年正月二十五日右遷陳州刺史北海李邕述石
室記列于苔壁懿乎寶厯元年秋九月二十日攝經
略廵官試大理評事權知軍州務賜緋魚袋博陵崔
公領寮屬及將吏遊于茲室探討奇跡異乎幽蹤盡
日攀躋不盡高意化清時官守司馬得倍盛遊輒敘

鄙詞紀于前事

刻石

杜寶符

寶符憲宗相黃裳之子官河南府參軍

呂溫集

度支郎

中郎官石大和中朝議郎守太子少詹事上柱國新

興縣開國男食邑三百戶賜緋魚袋

唐故京兆杜氏夫人墓誌銘

并序

夫人京兆杜氏爲名有日月矣自虞以還譜牒承
美揮翰於太史氏也閱周秦漢魏之書迫于革隋不
遠百祀而杜之嗣續官業有功于時者有名懋于代
者有負大人之材不伸於巖野者有詞清人標爲縉
紳之淮繩者暨夫神堯帝天下文皇宅四海若室屋

之時賢相有翼戴之功推夫人七世祖也時封萊國
公名見史籍厥後隨聖業而代有煥於文學者夫人
曾大父諱含章任左千牛累贈鄭州刺史夫人大父
諱綰任京兆府司錄累贈尙書左僕射夫人父諱黃
裳任檢校司空同中書門下平章事兼河中晉絳慈
隰等州節度使累贈太尉外族李氏出趙郡封東祖
世有大官不書可認其業茂矣門風清揚有弟兄四
人皆服勤儒業姊妹五人舉其顯者由次姊適宰相
韋執誼外生有官于臺閣者夫人天錫明敏若非學
知罔究古藉而洞得淑態笄年適河東裴潏潏以門

子入仕歷官五任澣氏之有別也則涉河而東宜指
大山山突古墳松檟百里崗環勢止徙塋畿洛自得
姓以來代修儒業史筆褒之爲第一衣冠凡三世外
內皆顯名跡追封定諡爲琳瑯慕嚮澣之同氣周行
迭進澣之甥姪錯落文秀人不知澣之昭敎自爲闕
耳故不備錄也澣性謹厚志尙儒雅凡未識澣者見
澣之風度俯仰皆曰豈非碩德名儒之家耶由是人
十之七八具詞也澣曾官于河潼知華驛時屬河北
有師拒王命者持詔之臣往復軍師日之百數輦闕
溢館舍公食不足卽夫人罄其私室以備官須往往

寒衣不續簞食絕味慮澣之內愧以職公而不補其
家則假以他事而飾詞以相怡悅時家甚窘而禮義
富之適澣廿年生子九人長曰枏業擅兩經次及女
等年皆稚子志性甚高夫人享年卅七大和乙卯歲
歿于崇賢里僦宅嗚呼天施幾何何人鶚年餘馨尙
存吉人遺旨里閭爲哭親愛無生以其年十一月廿
九日權窆萬年縣鹽安鄉杜光里時弟寶符追亡姊
之行止未編史策願寫誌石其文曰

高道浮雲雲散何尋德潤和璧其璧永沈令門正肥
青樓始構寂寞其生煒燁其後巖壁甚壯有時而傾

窮冬枯邊有時而精滄波萬里有時而田邱墟荒野
有時而城死楊空株有時而梯夫人此去永永無期
善惡莫分孰宰寘夫人忽天蒼昊不知

石刻

劉可記

可記大和中鄉貢進士

大唐故王府君墓誌銘

并序

公諱從政太原郡人也其先歷代簪裾閒生賢哲祖
因官遂家於河南府版籍焉曾祖諱冰使持節諸軍
事守虢州刺史鎮居方岳位列雄藩弘化之美信孚
百城祖諱琳仕爲原州司馬名以孝聞位因才達國

華人望榮觀一時府君卽司馬之長子也至性崇禮以奉宗祀感覆載之深恩戀晨昏而不事恭近於禮以此爲美不失其親以此爲貴夙夜虔虔匪躬之不逮恂恂於鄉黨愛敬盡於祖考協和宗族豈非福慶而致焉於戲禍兮無跡生也遇疾殄荒日臻百藥不救人有斯疾天喪斯聞享年七十於大和四年夏四月啟手于靈臺縣之私第嗚呼哀哉公弱冠之初娶於河東郡薛氏卽故雲麾將軍之嫡孫也夫人夙承善慶生自德門歸彼君子舍章永貞奉以舅姑流謙自誠潔齋承祀善復勤勞儀爾芳名內外欽屬吁哉

天道言負賢能以大和九年冬十一月顧命手家捨
其榮養公有三子長子元通次子元用幼子僧次嚴
等並以溫柔克諧全諸孝悌慕風泣血遠象高柴知
禮善喪豈唯顏子以開成元年歲次丙辰三月三日
合祔於皇考故塋卽涇州靈臺縣東三里北原之禮
也恐陵谷遷變刻于貞石銘之詞曰

昭昭白日昊昊上天悲風松栢瘞於隴田功勳承代
痛惜良賢□□□俄歸逝川白駒遡及日往月遷
至□□□諒陰墨言四時潛運永乎祀年千秋□□
墳所生煙石刻

趙商

商大和中朝請郎試左武衛兵曹參軍

唐故平盧軍討擊副使銀青光祿大夫檢校太

子賓

缺

城郡開國男食邑三百戶劉府君墓

誌銘

并序

公諱逸字海其先彭城人也昔陶氏之後裔祖諱方

缺

羣孤標獨異公忠濟物勇略稱時終雲麾將軍試

左金吾衛大將軍父諱元宗素蘊奇志早踐威旃親
衛爪牙內外經歷終義武軍兵馬使金紫光祿大夫
檢校太常卿公卽第四子也幼專詩禮長藝弓裘不

墜門風雅稱宗祖長慶初以鎮翼不軌醜跡彰聞元
戎太原王公乃脫彼兇妖束身詣闕公乃親爲侍從
共拔海墻殊節旣成眾望斯洽主上以太原公勳績
超拔乃授義成軍節度使公卽行當俄又有除鳳翔
節制公又親從旣至十年從事一旦無虧爾又有國
命除平盧軍節使公又從至復署前銜時元戎自丁
家戚將謀葬於京輦乃命公行事無纖大一以歸付
旣達所務俄聞元戎寢疾卽星馳卻迴及到以至薨
歿公乃號口發泣情不勝哀悲懷鬱結因茲成疾大
和八年三月廿日終于青州私第享年五十有九以

其年四月廿五日吉權窆青州益都縣永固鄉之原
禮也凋弓旣缺施遶樹之能寶劍沉埋自有十年之
氣公夫人清河孟氏晨昏號泣痛不可勝有子一人
儒林郎試隴州沂陽縣尉曰澄秘兼居職位已及尊
親爲子之道斯之當矣慮其年代更易陵谷隕移爰
刊貞石將期不朽其銘曰

江陸之才挺生於世毅勇相襲英謀斯口天何不佑
降此禍殃質形雖滅其名永口石刻

皇甫曙

曙元和十一年登第寶歷間崔從鎮淮南辟行軍司

馬開成中澤州刺史

金剛經幢記

余在髫鬢忽聞家人轉請是經□生受樂題曰傳□暗
記數行及長思之信有宿習自化寐至□□時念不
輟常願廣宣同志□□無窮今故刻石建幢永爲供
養開成元年歲次丙辰五月七日建澤州刺史皇甫
曙記

石刻

宇文坤

坤後周介公元孫太陽子開成初官經畧隨軍將仕
郎試太子通事舍人

故銀青光祿大夫使持節溪州諸軍事守溪州
刺史鴈門縣開國男食邑三百戶上柱國賜
紫金魚袋田公誌銘

并序

噫四時有代謝人情有始終貴賤榮枯有生有威者
也然哲有忠貞者仕主之令名有節行者爲人臣之
遠格夫處人天之極唯忠孝焉忠於事主可建邦家
揚于王庭可爲人傑一而遂之則故田使君之能事
矣使君公諱英字英鴈門人也安平君之苗裔也其
先祖粉榆京鎬德寄黔中冠冕聯綿朱紫不絕烈考
王諱寅字官任黔州洪杜縣令秩滿□奏授光州司

馬上柱國賞緋魚袋詢訪耆舊稱文詞絢練翰墨芳
馨道贊邊城化毗方岳挹王祚之美化得羅含之風
者哉太妣蘇性也武功之貴族也母儀有則貞淑可
觀德充趙括之親賢可王陵之母然古今有隔節行
不殊者哉公稟精粹之氣岌然天姿氣魄稜稜事君
竭節能展熊羆之任肅著瓜牙之威機變權謀人具
瞻仰又位分符竹宣贊六條政術多方化洽封部不
苛不擾愍恤惇發布政五溪譽傳巴楚嗚呼享年六
十有四良圖未展厚祿初霑自守郡城纔經二稔天
道恍惚時事多端悔愴吉凶陰陽莫測無何遘疾業

力無施運命所乖奄歸真宅冰容忽逝永弃明時一代生涯千春已畢楊朱益泣墨子重悲以開成二年丁巳歲暮春之杪二旬有八日終於西陽官舍至冬十二月旬有三日壬寅塋于府城西南隅虎牙峰高原禮也粵有節婦張夫人者則南陽張口君仙尉之女也芳閨令淑婉婉貞明秦晉合儀調如琴瑟節偕杞婦賢頗鴻閨者歟且鬻其服用資贍送終喪盡其哀祭盡其敬一女特達立節忘軀大義克崇婦道之本也有善不旌有節不錄何以激人倫而彰化本也或慮山迴谷圯或市或朝主嗣莫分命余述誌余學

識淺劣承乏操文不揆管窺叨陳梗槩銘曰

偉哉田侯禮樂鏘鏘敦經閱史爲人紀綱公心翼翼
爲棟爲樑位分符竹惠化封疆亢龍有悔悲哉夕陽
千秋萬歲委骨郊荒

石刻

王宰

宰懷州溫人初名晏宰後去晏獨名宰官至河陽節
度使唐書附王智興傳

靈石縣記石

開成五年自隴州防御史拜工部尙書節制邠寧至
會昌三年蒙恩換許昌節至九月自許昌統當軍驍

卒洎河陽義成宣武浙西宣歙等軍兵馬充攻討使
誅除壺關寇嗣至四年八月十日梟逆首獻闕下蒙
恩獎寵除左僕射至九月將歸許昌軍次溫縣天使
持節至又授寵詔遷鎮北門十月過此至會昌六年
上登寶位蒙恩加司空至大中元年奏以雲蔚朔三
州之腹爲賊喉要故戍舊封多所廢歟蕃寇奔突無
所限碍又相厥土濃壤可出軍口遂疏其利宜請立
耕戰三城募卒六千任其事務農習戰永斥邊寇克
富軍儲至二年九月秋成境肅上錄其功詔就拜司
徒宰以叨乖微効祗寄北都及今五稔日懼辜悔靡

遑非據遂瀝誠拜章乞覲明庭既蒙恩下允誠懇至
十二月十二日遂得祇詔擁節趨闕赴正朝聘之禮
至明年正月十一日又蒙聖旨獎加光祿大夫依前
檢校司徒卻歸本鎮至二月五日過此因覽其重巒
復疊積樹參差汾水迴平而潺湲天險蔽抱而崇固
可壯夫霸曷皇業萬代之基駐旆關亭吟睇移景又
觀中令河東公及相國令狐公左揆狄公相國崔公
來罷之題列遂輒紀其轉歷及往復所自云

金石續編

盧從儉

從儉大和中官朝散大夫行京兆府戶曹參軍

唐沔王府諮議參軍張公墓誌銘 并序

王者制國立文武之訓招選茂異命百執事其於興
禮樂陳教化式繫乎文禁奸慝刑暴亂必資乎武分
鑑並驚廢一莫可其有器識通濟則兼用之該二事
者今得之於張君矣君諱侔字侔其先北地貴強族
也曾王父栖巖皇平州刺史大父瓌皇龍峒節度邢
洺觀察使邢洺生道晏皇左散騎常侍兼御史大夫
涿州刺史皆風格奇偉洞究韜略張皇戎律宣布朝
經延慶後昆濟美不泯公卽涿州第三子克荷前修
不隕厥問始自齟齬已若老成抱忠勇果敢之姿仰

祖宗勲重之業而乃飾以書劒勵其鋒銑公之先舅
司徒高公每所歎重司徒公諱霞寓嘗隨族父崇文
平劍南西川寇難論功第一徵拜衛將軍尋授振武
軍節度使又轉唐鄧邠寧慶等道節度使入備爪牙
出膺藩翰揚厯雄鎮威重當時以公孝敬忠勤可

字

戎事而曰吾之宅相其在爾乎因推頰哺之恩委

以牙門之任厯職既

缺一字

官秩累遷皆著能名顯赫

中外旣登朝序克揚休聲方振翮於九霄忽埋魂於
重壤天平不慙嗚呼哀哉以大和三年八月十一日
終于沔王府諮議參軍年四十四歲與不識聞風慨

然憫公之有其才而無其時也夫人清河崔氏清門
淑德婉婉聽從有合盍其牢之思無齊眉偕老之業
撫棺誰訴塊然未亡有子一人曰憲郎種孺未立呱
呱以號公之內弟右衛威將軍扶卽司徒公之元子
也含風雲然諾之分撫孤雪淚感平昔指使之恩爰
悉家財式護窀穸以其年十月廿三日窆于萬年縣
崇義鄉南姚里蓋從宜也且曰陵谷靡常將識泉戶
乃以銘文見託感其義故抽毫以應之銘曰

於戲張君文武兼才業廣運促遄歸夜臺風烈則在
精魂不迴淑人如此彼蒼何哉龜筮叶從宅兆將託

晴河天曉寒郊月落風淒薤露塵隨總幕度城關兮
逶迤闕音容於泉壑

石刻

李潛

潛官嶺南西道觀察支使

兄錢珣
行制

尊勝經幢後記

先考故綿州刺史李君封樹前尊勝眞言石幢之餘
石嗚呼潛罪疊酷重邁大禍殘喘未泯以及今日號
奉安祔如斬之創鉅痛無所解聞西方教有尊勝眞
言可以福薦神道是用購集鐫刻謹立於封樹前二
步冀清淨塵露之語上爲冥祐下則微蠲終天之苦

既訖功宜具年月日幸佛語之刻有餘謹梗槩崩圯
□□於此嗚呼潛生薄祐在襁褓先妣元夫人弃世
外祖母崔夫人憐而育之命甚微而能活年七歲外
祖母又歿乳嫗提挈方獲侍先君於本家繼盧夫人
憫其幼孝撫愛如己生先君親授詩禮每訓之曰吾
冀爾異日能□策名進士古人揚名顯親爾知之乎
潛其時雖稍駭佩斯訓不敢怠自後侍車遊宦勤遠
役厯星歲無惰業以至就鄉里貢亟不售先君益導
勵其志逮會昌癸亥歲始升名太常第既成事歸覲
巴西郡先君撫以泣曰吾□□代稱文儒爾自此當

謹嗣素業矣卽退實思調集得祿以充養天奪其志
酷禍荐及孤危餘氣艱棘難全時猶引息啜泣以思
似續之重旣自蜀護奉歸洛京由荊州戡先妣以至
遂安祔於河南縣金谷原大王父太常府君塋之東
北六十七步若先君志行盛業先妣懿德門風具在
鄭州刺史李公褒所撰石誌今不敢以荒穢鄙語上
黷先德嗚呼天何不仁重毒單子之苦同氣皆早世
顧經杖隻影則茹荼以備祭嗚呼聞西方佛拯世用
大悲法至於窈冥不測之際潛有望尊勝眞言之功
助祐玄遠於是頓顙出血染翰就石此石有泐罔極

之痛與天地無極謹紀 唐會昌四年歲次甲子十

二月己卯朔十九日丁酉孤子李潛泣血長號書刻

李栖元

栖元會昌中東川節度左二將檢校太子詹事上柱
國隴西縣開國侯

造像碑陰記

施水犍牛五頭行營職掌所由身官健子將等共花

見錢口拾阡文又缺三生口贖廢大雲寺地每年收

租子充此潔齋前件牛並合定缺四士之缺六發

願施口堂便充缺七值利充二時齋附水口常住供

養并

缺三字

阡文贖莊布施日後如有人隱欺

缺五字

僧

齋當受百牛

缺三字

不出

缺六字

李栖元謹白

唐文續拾卷五